

HSET RÔMA

1

¹ Phaulô hapǒng da Jesus Christ, khoe jah creó
broq mangai Tiaq cla, khoe jah lah ðòeq
crài hu anoe Bàu lem da Boc Plính,

² aih Bàu lem enh nèh raq Boc Plính khoe tèu
adroe ajang wì pajàu ta hset hadròeh,

³ ràu trùh kon da haq, tiaq xech akia aih hauang
loh enh nang noe bùa Ðawit,

⁴ tiaq yiang da kan hadròeh, taiq haq khoe rìh hlài
enh kan cachìt, aih ma khoe jah nhìn haq joq kon
Boc Plính i cwiàng i tai, aih raq Chuaq Jesus Christ,
Chuaq da bèn,

⁵ canòm ka haq xam yiniq haq aih, nhèn ma khoe
jah waq kan tabàih dech, jah broq mangai tiaq
cla, ðòeq creó ðìq ka mangai rìm diac qnoeq trùh
ajang kan loq iu da manoh lùì,

⁶ ta bài mangai aih, oh ðaq hanoh khoe jah creó
enh cla Chuaq Jesus Christ;

⁷ gòe ðìq ka mangai Boc Plính ma loq waq deh oe
ta Rôma, jah creó broq mangai hadròeh. Waiq ðìq
ka oh ðaq jah waq kan tabàih dech, jah kan catèm
enh Boc Plính, aih Baq bèn, xam enh nòe Chuaq
Jesus Christ!

Phaulô enh trùh hmàih ta Rôma

⁸ Adroe ðìq ðǒng aih, canòm ka Chuaq Jesus
Christ, au manè apôi Boc Plính majah qmang aih
manoh lùì da oh ðaq khoe jah anoe hlài jàp jìa ta
crǒng taneh.

⁹ Boc Plình au ma patìh dìq dèh ka manoh ti ajang anòe au ma anoe Bàu lem da kon haq, hadai wiang panhìn au ùh lah hêq ka ràu trùh oh daq.

¹⁰ Rìm yàng jò au waiq khàn, au waiq khàn tàng ùh manòeq kô dua hì atìq èh tiaq manoh Boc Plình, pèh am trong au jah trùh ta oh daq.

¹¹ Joq qmang aih, au toq tangèh jah trùh hmàih ka oh daq, òeq hadai jah pajùm kan tabàih yang ti oh daq, òq oh daq rai èh rai cajap,

¹² aih iq, au oe qne oh daq, òeq hadai bèn wiang parông manoh dabau jah tadêh pajùm ta manoh lùì bèn, aih manoh lùì da oh daq xam da au.

¹³ Au ùh enh òq oh daq ùh qnì, bàc yàng au khoe padon lam hmàih ka oh daq òeq hu jah wiang git plì ti oh daq xam mangai diac wì mahaq i kan khech tât au trùh manòeq.

¹⁴ Au pòq dòeh mangai Gorec xam mangai ùh xài mangai Gorec, mangai rabiaq xam mangai blùng.

¹⁵ Aih iq dài au majah toq enh anoe Bàu lem am ka pì oh daq, aih mangai ma rìh oe ta Rôma.

¹⁶ Joq au ùh camaih ka Bàu lem majah qmang aih, aih raq kan itai da Boc Plình òeq dèch rìm ngai ma i manoh lùì, adroe aih ka mangai Juda atìq aih ka mangai Gorec;

¹⁷ Majah qmang aih, enh dalam ka Bàu lem kô khoe mahnu kan taq atoq da Boc Plình, xi manoh lùì men jah, èh ajèn trùh ta kan lùì hòh, qmang ka bàu ma khoe achìh: “Mangai taq atoq rìh xi manoh lùì”.

Boc Plình panòeh ka mangai dù

¹⁸ Qmang aih, kan nòeh da Boc Plình khoe mahnu enh plình tablêq hlài ka rìm trong ùh qnì iu yùq xam kan ùh taq atoq da bài mangai yǒc kan ùh taq atoq ðòeq padit trong joq qnàng.

¹⁹ Majah qmang aih, yiniq cleq hu dôq wì jah loq ka Boc Plình, ðiq khoe paqnoh ka wì, Boc Plình khoe patô ka wì,

²⁰ majah qmang aih kan geo da haq mat bèn ùh xau hnoq, aih la kan itai mǒeq ðòe xam manoh haq, enh jò baxèm broq plình crǒng taneh khoe dayình qmòe tiàh ka mat hnoq, jò wì ti ngan yiniq broq da haq. Aih iq dài wì ma pi jah aclai rađeh,

²¹ majah qmang aih yac ka wì loq ka Boc Plình mahaq wì ùh waq broq qngah yiniq haq aih Boc Plình, ẽh hadai ùh waq manè apôi haq, ti tiaq toq trong ùh loh cleq xam manoh blùng bình toq kan clam cluiq.

²² Wì doe ðeh rabiaq, mahaq loh ka ratùt.

²³ Wì haq khoe halih kan ranhòm ùh lùch da Boc Plình yǒc radua qmù loq hnhung lùch da kon mangai, da chìm, da ngè rìh tagùng, da ngè loq moq ta taneh.

²⁴ Aih iq, Boc Plình majah dôq da wì haq cìh deh ta kan amùa qmang ka manoh cla wì haq ma enh, loh qmòe ka broq kan camaih hloe deh ka chac cla.

²⁵ Wì haq halih trong joq qnàng da Boc Plình, ðòeq yoc kan amòng, kùh waiq rai patìh ka bài ngè Boc Plình ma broq loh, ùh kùh waiq Boc Plình ma broq loh bài ngè aih, aih Boc Plình bèn ma khòh manè apôi mǒeq ðòe! Amen.

²⁶ Taiq ajang raq Boc Plình majah hi dôq da wì haq tiaq trong tango anang jàng ka camaih,

taqne wì haq, gucadri pi rìh hatiaq ma troq trong, wìh tiaq trong ùh troq.

²⁷ Gucalô hadai qmang aih cađac trong gucadri gucalô, tiaq trong ùh troq aih toq ti enh ka dabau, hadai gucalô aih waq ka dabau, èh cla wì haq hi ep pòq dèh kan baxa aih.

²⁸ Ùh hnau ka aih hòh, pàng wì haq ùh nhet chaq canau ka Boc Plình, aih iq Boc Plình majah cađac wì tiaq dèh manoh ùh wìa, òòeq broq toq trong ùh loh cleq.

²⁹ Wì bìn̄h toq kan ùh taq ataq, kan đùc, kan plai, ratauq, toq kan tagit, jêh đac mangai, talech, loq qnùt, loq nòeh;

³⁰ tapoch dech, tapoch qmèq ka dabau, git ka Boc Plình, da hadiàc, padèch rađeh, catèh, rabiaq trong dù, ùh iu bàu miq baq;

³¹ blùng, ùh qnì wèq dèh bàu, ùh qnì tamèt, ùh i manoh loq waq.

³² Yac ka wì loq ka Boc Plình taq ataq i doe: mangai leq broq bài yiniq qmang aih troq ka cachit, aleq ma xài toq wì haq broq hi hêq, mahaq wì ti baxrùq tam mangai qnoeq broq qmang aih diq.

2

Kan hadrah enh Plình

¹ Qmang aih, ìh qmat mangai ma toq ti tah hadarah tau, yac ka ìh qmat cabô ùh dèh, waq toq ìh hi hadrah mangai qnoeq aih èh ìh pi jah cwaih rađeh hòh, majah qmang aih jò ìh tah hadrah ka wì qnoeq, aih ìh hadai tah hadrah ka cla rađeh, ìh

tah hadrah ka wì mahaq cla ìh hadai broq qmang ka wì.

² Manòeq kô, bèn loq kan hadrah da Boc Plình am ka òai mangai broq yiniq qmang aih, aih joq troq tiaq bàu joq qnàng.

³ Wùih! mangai ma toq ti hadrah ka òai mangai broq qmang aih, mahaq cla hadai broq ùh troq, pì loq xoh cla pì claih ka kan hadrah enh Boc Plình qmòh?

⁴ Ahiaq ìh ùh dèh dèm đac kan loq waq bình halùih, kan loq àt, kan ùh manaq da haq, loh ka pì qnì canau kan loq waq da Boc Plình ma aràng ìh trùh ajang kan loq raxach ùh xài?

⁵ Taiq manoh ìh cadoq, ùh raxach, aih ìh chàu pabình đòeq ka rađeh kan nòeh ta hì mahau atiq kô èh, jò kan hadrah taq atoq da Boc Plình mahi trùh,

⁶ jò aih, Boc Plình hi am hlài da tang ngai tiaq tang yiniq wì ma broq:

⁷ Mangai leq cajap manoh broq trong lem, chaq kan qngah, kan ranhòm xam kan ùh hiaq loq lùch. Boc Plình am ka wì kan rìh halình mòeq đòe;

⁸ mangai leq i manoh toq àu tablêq, ùh tiaq trong joq qnàng, mahaq iu tiaq kan ùh taq atoq, aih èh Boc plình patem ka wì kan nòeh xam kan mahau.

⁹ Kan ùh catèm kan nanxa ka mangai broq dù, adroe aih ka mangai Judà, khoe aih ka mangai Gorec;

¹⁰ mahaq kan qngah, kan ranhòm, xam kan catèm am ka rìm ngai broq lem, adroe aih ka mangai Judà atiq aih ka mangai Gorec.

¹¹ Majah qmang aih, Boc Plình ùh loq waq ka

apah.

¹² Mangai leq broq yiniq lui, yac ka haq ùh qnì ka ranenh haq aih dua hnhung lùch, magari leq loq ka ranenh mahaq broq yiniq lui, aih èh ep òòeq da ranenh hadrah haq;

¹³ majah qmang aih ùh xài magari leq tàng òòc ranenh aih hi wìa magari taq atoq enh ngèa Boc Plinh, mahaq magari ma broq tiaq ranenh aih majah broq magari taq atoq.

¹⁴ Ma joq qnàng, magari diac wì ùh i òeh ka ranenh Môise, jò wì haq broq òeh trong ranenh ma thê, bài magari aih yac ka ùh i ka ranenh, dua khoe broq ka raðeh i ranenh.

¹⁵ Wì haq patô qnoh trong ranenh ma thê aih khoe achìh òeh ta manoh cliac wì haq: Manoh da cla panhìn am ka ranenh, gàu ngoc da cla i jò bahmàng i jò palem deh cla.

¹⁶ Aih la bài yiniq padon trùh ta hì da Boc Plinh enh dalam ka Chuaq Jesus Christ hu hadrah kan hlèp ta manoh kon magari, wop qmang ka Bàu lem au ma khoe anoe.

¹⁷ Manòeq, ìh doe raðeh kô magari Judà, kùì padài enh qnhèq ka ranenh, catèh òeh loq ka Boc Plinh,

¹⁸ loq ka manoh haq, canau trong leq troq, trong leq ùh, majah qmang aih ranenh khoe hnài ìh;

¹⁹ catèh òeh broq magari ajèn trong ka magari lua mat, broq kan qngah ka magari oe ta clam,

²⁰ broq magari hnài bài magari blùng, bài magari qnhòq gèh manoh, majah qmang aih ta hset ranenh i kan rabiaq xam trong joq qnàng,

21 qmang aih ìh hnài mangai qnoeq mahaq ùh hnài cla raḏeh qmoh? Ìh hnài apaq atùng, mahaq ìh atùng!

22 Ìh doe: ùh khòh tango, mahaq ìh tango! Ìh git ramòt ka òai radua qmù, mahaq ìh blah yóc òa haq dahwèq.

23 Ìh hnhè raḏeh wèq tiaq ranenh, mahaq ìh ùh broq tiaq ranenh, òai aih raq ìh ma khoe broq kan xep ka Boc Plình!

24 Taiq pì raq, wì mangai enh gùng majah tapoch qmèq ka yiniq Boc plình, tiàh qmang ka bàu ma khoe achìh.

25 Joq! tàng pì broq tiaq ranenh, ramènh kat akia aih ùh hiaq ngwan, mahaq tàng pì broq ùh troq tiaq ranenh, yac ka pì broq ramènh kat akia aih bu òiang ùh.

26 Qmang aih, tàng mangai qnhòq broq ramènh kat akia wèq tiaq bàu ranenh hnài, aih ma ùh tiàh ka khoe kat akia qmòh?

27 Mangai ùh broq ramènh kat akia, mahaq wèq gèh geo tiaq bàu ranenh, mangai aih èh ma hadrah òai pì, aih òai mangai yac ka i ranenh, i broq ramènh kat akia, mahaq ùh lènh broq tiaq ranenh.

28 Qmang aih mangai leq toq enh gùng haq broq mangai Juḏa, aih ùh xài mangai Juḏa, ramènh kat akia toq enh gùng, aih ùh xài ra mènè kat akia;

29 mahaq mangai Juḏa ma joq qnàng aih mangai Juḏa enh dalam, ramènh kat akia ma joq qnàng aih ramènh kat akia enh dalam xi Yiang hadròeh, ùh xài tiaq toq bàu achìh. Mangai Juḏa qmang aih ma tajì ka manè, khòh jah padèch, ùh

xài enh kon mangai mahaq enh Boc Plình.

3

Boc Plình hadrah taq atoq

¹ Tàng qmang aih kan yeo loe da mangai Juda aih qmang leq, ùh meh ramènh kat akia ajah cleq?

² Jah bàc trong. Adroe aih rameh: Aih xài bàu Boc Plình khoe am ka mangai Juda.

³ Mahaq tàng ta wì aih i òiaq ngai loq tablòq manoh ka Boc Plình, kan loq blòq manoh da wì haq ahiaq broq ka kan ùh tablòq mannoh cliac da Boc Plình loh qngwan qngwaiq ùh?

⁴ Ùh i qmang aih! Boc Plình aih joq qnàng, kon mangai kô ma loq qnùt, tiàh ka khoe achìh
“Wì jah creo ka ìh mangai taq atoq, jò ìh capoch, Jah blêq jò wì tah hadarah ka ìh”.

⁵ Mahaq tàng kan ùh taq atoq da bèn jah patô qnoh kan taq atoq da Boc Plình, aih èh bèn anoe qmang leq? Boc Plình ma ùh taq atoq jò haq qnoh kan panòeh ka bèn qmòh? (Au capoch troeq wì ma dîh loq rahen)

⁶ Joq ùh lòm, tàng qmang aih èh Boc Plình hadrah crống tneh kô qmang leq?

⁷ Mahaq tàng bàu joq qnàng da Boc Plình jah kan ranhòm haqnhèq ajang nòe bàu tapoch qnùt da au, aih hagleq au majah oe ep pòq kan hadrah tiàh ka mangai broq yiniq lui?

⁸ Tàng qmang aih hagleq bèn ùh broq trong dù òe q jah trong lem, tiàh ka mangai loq patah khoe capoch dech ka nhèn doe nhèn hnài trong aih? Kan hadrah baxa taqmòq ka wì haq aih taq atoq.

Ừh i mangai leq ma taq atoq

⁹ Aih qmang leq, bèn i cleq ma yeo lem ka wì? Ừh lòm i, hacô bèn khoe anoe panhìn yac ka mangai Juda yac mangai Gorec dìq oe enh qneq ka cwìang yiniq lui.

¹⁰ qmang ka khoe achìh:

“Ừh i cabô taq atoq, yac ka mòeq ngai dua ùh,

¹¹ Ừh i cabô i mamoh loq hèm,

Ừh i cabô ti chaq Boc Plình.

¹² Wì haq dìq khoe lam hwang, dìq khoe pi loh cleq;

Ừh i mòeq ngai broq trong lem, yac ka mòeq ngai dua ùh.

¹³ Hông wì haq da hah tìah ka ngah ralùng hanang;

Yỗc dèh rapet òeq qnùt wì qnoeq;

Blìa hacùng wì haq i nồc bìh tùa.

¹⁴ Hacùng wì haq toq nà hanip xam kan pagau.

¹⁵ Jènh wì haq darênh toq ka broq ta ùc mahim.

¹⁶ Trong lam da wì haq toq kan raliang xam nanxa,

¹⁷ Wì ùh lah qnì ka trong ma catèm.

¹⁸ Enh ngèa wì haq ùh i kan loq iu yùq Boc Plình.

¹⁹ Manòeq kô bèn loq, rìm yiniq ranenh ma anoe, aih anoe ka rìm ngai oe enh qneq ka ranenh, dōq rìm toq hacùng dìq ep caqnhip, dìq ka phù cròng ep pòq yiniq lui enh ngèa Boc Plình;

²⁰ majah qmang aih ùh i ka cabô broq tiaq ranenh ma jah creo ka haq aih taq atoq enh ngèa Boc Plình, majah qmang aih ranenh patô dōq wì loq dèh ka yiniq lui.

I manoh lùì men jah kan taq atoq

21 Mahaq manòeq kô, kan taq atoq enh Boc Plinh, Hset ranenh xam bài pajàu ma khoe wiang panhìn, khoe patô qnoh enh gùng ka ranenh:

22 Aih la kan taq atoq da Boc Plinh oe ajang nòe bèn lùì Chuaq Jesus Christ, am dìq ka rìm ngai ma lùì. Ùh i cleq crài ka dabau,

23 majah qmang aih rìm ngai dìq khoe broq yiniq lui, khoe capòch ka kan ranhòm da Boc Plinh,

24 mahaq canòm kan tabàih enh Boc Plinh, wì jah dech kan taq atoq, majah qmang aih kan baxon hlài khoe jah broq gêh enh dalatm ka Chuaq Jesus Christ,

25 aih la Mangai Boc Plinh khoe dèch haq broq ramènh baxon hlài, xi manoh lùì ta mahim haq aih, Boc Plinh rangep ka kan panòeh, ajang aih haq paqnoh dèh kan taq atoq. Majah qmang aih, haq khoe caqnaih da wì yiniq lui ma broq enh nèh,

26 Haq khoe broq qmang aih òòeq taqnhòng kô haq patô òeh kô taq atoq òòeq creò ka mangai leq ma lùì Chuaq Jesus jah kan taq atoq.

27 Qmang aih, kan catèh oe jang leq? Pi i, khoe cađac, cađac ajang ranenh leq? Tiaq ranenh da yiniq broq? Ùh xài, mahaq tiaq ranenh da manoh lùì;

28 majah qmang aih bèn doe kon mangai jah kan taq toq ajang noè manoh lùì, ùh xài ajang broq tiaq ranenh.

29 Ahiaq Boc Plinh aih Boc Plinh toq da mangai Juda? Ma ùh xài hadai Boc Plinh da mangai diac wì dìq?

³⁰ Majah qmang aih i moèq Boc Plình raq, aih Yiang broq ka mangai kat akia jah taq atoq tiaq manoh lùì, hanoh broq ka mangai ùh kat akia jah kan taq atoq tiaq manoh lùì.

³¹ Tàng qmang aih, canòm ka manoh lùì bèn ka cađac ranenh qmòh? Joq ùh lòm i qmang aih! Yeo hnau ka aih bèn broq ka ranenh jah cajap.

4

Apraham jah taq atoq xi manoh lùì

¹ Qmang aih bèn anoe qmang leq Apraham cadraq bèn. Tiaq xech akia haq khoe jah lòeq cleq?

² Joq qmang aih, tàng joq haq khoe jah kan taq atoq tiaq yiniq broq, aih i noè ðòeq haq jah padèch rađeh, mahaq enh ngèa ka Boc Plình ùh xài qmang aih.

³ Majah qmang aih, Hset Hadròeh hnài cleq? Apraham lùì Boc Plình, bìac aih raq khoe broq ka haq jah kan taq atoq!

⁴ Manòeq kô mangai abroq, hliac jènìh baha aih ùh xài kan tabàih, mahaq tiàh ka dòeh,

⁵ mangai ma ùh dùh i broq qmòe cleq, mahaq lùì Boc Plình aih Yiang broq ka mangai pòq yiniq lui jah kan taq atoq, manoh lùì da haq aih majah creò ka haq aih taq atoq.

⁶ Đawit hanoh anoe qmang aih, jò haq ràu trùh xôq ramot ka mangai jah Boc Plình am ka haq kan taq atoq ùh tiaq trong yiniq abroq, rameh:

⁷ “Joq xôq ramot qnàng ka ðài mangai lui haq jah caqnaih, Yiniq lui haq jah gahnàp!

⁸ Joq xôq ramot qnàng ka mangai Boc Plình pi arèn da haq yiniq lui”.

⁹ Bàu anoe trùh xôq ramot aih, ma anoe toq ka mangai ma kat akia qmòh? Hadaì am ka mangai ma ùh kat akia. Majah qmang aih bèn doe ameh: Manoh lui da Apraham khoe jah tình ka haq taq atoq.

¹⁰ Mahaq jah tình qmang leq? Atiq ka haq broq ramèn kat akia loq adore ka haq broq ramèn kat akia? Aih ùh xài atiq ka haq broq ramèn kat akia, mahaq adroe.

¹¹ Qmang aih, haq khoe jah yóc teo xít kat akia, tìah ka teo da kan taq atoq haq ma khoe jah dèh adroe xi manoh lui, jò haq qnhòq broq ramèn kat akia, òòeq hu broq baq òìq òòng bài mangai lui mahaq ùh broq ramèn kat akia, òòq wì aih hadai jah kan taq atoq.

¹² Èh hadai broq baq bài mangai broq ramèn kat akia, aih baq da bài mangai ùh xài toq kat akia hi hêq, mahaq hadai cadiang tiaq teo manoh lui manoh lui da Apraham kan cadraq bèn, ma khoe jah dèh adroe ka haq broq ramèn kat akia.

¹³ Qmang aih, bàu ma têu am ka Apraham xam nang noe haq jah yóc òìq crống tanèh kô broq kùng hang, ùh xài loh enh ranèh, mahaq loh enh kan taq atoq da manoh lui.

¹⁴ Majah qmang aih, tàng tiaq ranèh men jah kùng hang, aih èh manoh lui hi loh ka qngwan qngwaiq, bàu têu am hadai khoe cađac.

¹⁵ Majah qmang aih, ranèh plòh loh toq kan panòeh, mahaq taleq ùh hìaq i ranèh, ta aih hadai ùh i mangai broq ùh troq ka ranèh.

¹⁶ Qmang aih, canòm ka manoh lùì kon mangai ma hì jah waq kùng hang, bài yiniq aih òìq jah xi kan tabàih dech, òòeq bàu tèu jah cajap ka nang noe Apraham, ùh xài am toq ka nang noe oe enh qneq ka cwàng da ranenh, mahaq hadai am ka nang noe i manoh lùì da Apraham, kan cadraq bèn,

¹⁷ wop qmang ka bàu ma khoe achìh: Au khoe dèch ìh broq baq bàc diac. Haq aih joq baq da bèn oe enh ngèa ka Boc Plình, aih Mangai haq ma khoe lùì, aih Boc Plình ma am kan rìh ka mangai cachit, creò ka bài yiniq qnhòq i tìah gleq khoe i.

¹⁸ Haq taqngèh gòm jò pi qmòe ka dua hu gòm tangèh, mahaq dua haq lùì, aih haq ma hijah wìa baq bàc diac, tiaq qmang ka bàu khoe doe ka haq: “Nang noe ìh jah qmang aih èh”.

¹⁹ Haq hnoq dèh chac khoe craq, majah qmang aih khoe ten hrình hanam, hnoq Sara pi oe jah ha-ang, mahaq manoh lùì da haq dua ùh xùch.

²⁰ Haq ùh lòm rangòt, hadai ùh hìaq ùh tìn bàu Boc Plình, mahaq kan lùì haq èh rai dèh rai toq manè apôi Boc Plình.

²¹ Majah qmang aih haq lùì trong leq Boc Plình khoe tèu, Boc Plình i cwàng òòeq broq gèh trong aih.

²² Aih ìq, dài manoh lùì da haq khoe broq ka haq jah kan taq atòq.

²³ Bàu ma doe: “Manoh lùì da haq khoe broq ka haq jah kan taq atòq”, aih ùh xài anoe toq ka mòeq ngai cla haq,

²⁴ mahaq hadai anoe am ka bèn, manoh lùì hadai broq ka bèn jah kan taq atòq, majah qmang

aih bèn lùì Boc Plình aih Mangai khoe broq ka Chuaq Jesus, Chuaq da bèn rìh hlài enh kan cachìt.

²⁵ Taiq yiniq lui bèn wì rùp jêh đac haq, haq rìh hlài đòeq broq ka bèn jah kan taq atòq.

5

Kan catèm

xam kan tangèh Thi Tv 14:1-3; RoRm 53:3 MThi Tv 140:3 EsIs 59:7, 8 SaSt 15:6

¹ Qmang aih patep pang jò khoe jah creò ka bèn mangai taq atòq tiaq manoh lùì, aih bèn khoe jah hatroq ti Boc Plình, canòm ka Chuaq Jesus Christ da bèn.

² Aih Mangai broq ka bèn jah mùt ta kan tabàih dech kô, aih raq kan tabàih ma broq ka bèn jah yòng cajap manòeq, èh bèn hadai catèh rađeh ajang nòe tangèh gòm kan ranhòm da Boc Plình.

³ Ma xài toq aih hi đìq, bèn hadai catèh rađeh ta kan nanxa đìq, majah qmang aih bèn loq kan nanxa men loh kan loq kềm,

⁴ kan loq kềm men loh kan qnhrang, kan qnhrang men loh kan tangèh.

⁵ Kan tangèh ùh broq ka bèn ep camaih xep, majah qmang aih kan loq waq da Boc Plình khoe pùc jàp ta manoh bèn xi Yiang Hadròeh ma khoe am ka bèn.

⁶ Joq qmang aih, jò bèn oe raq ùh nac canèn, tiaq troq dèh jò ma SaSt 17:5 SaSt 15:5 pajaq adroe, Christ khoe cachìt am ka mangai i yiniq lui.

⁷ Biaq ka i mangai chiuq cachìt am ka mangai taq atòq, dùnh dùnh ji loq i mangai cachìt am ka mangai lem.

⁸ Mahaq Boc Plình mahno kan loq waq haq am ka bèn, jò bèn oe raq mangai i yiniq lui, aih Christ khoe cachit am ka bèn.

⁹ Manòeq kô bèn khoe canòm ka mahim haq òeq jah kan taq atog, aih èh hadai canòm ka haq raq òeq hu jah dèch claih khoe ka kan mahau kàn enh Boc Plình dàng leq hòh!

¹⁰ Majah qmang aih jò bèn oe raq tablêq ka Boc Plình, mahaq khoe jah hatroq hlài ka haq canòm ajang nòe kon haq khoe cachit am ka bèn, loq ka manòeq kô jò khoe jah hatroq, bèn jah canòm kan rih da Kon aih raq òeq bèn jah dèch dàng leq hòh!

¹¹ Ûh xài toq aih hi òeq, mahaq enh dalam ka Chuaq Jesus Christ bèn jah catèh ràdèh ta Boc Plình, canòm ka haq aih bèn khoe jah hatroq ka Boc Plình.

Cachit oe enh dalam ka Adam, rih hlài oe enh dalam ka Jesus Christ

¹² Qmang aih, taiq mòeq ngai raq yiniq lui ma khoe mùt ta crông tanèh kô, taiq yiniq lui majah i kan cachit, hadai qmang aih kan cachit khoe trùh ta rìm ngai, majah qmang aih taiq rìm ngai òeq khoe i yiniq lui.

¹³ Majah qmang aih, adroe ka i ranènh, yiniq lui khoe i ta crông tanèh kô, mahaq qnhòq i ranènh, dài aih yiniq lui hadai qnhòq taqmòq ka cabô.

¹⁴ Hnoq anoe qmang aih, patep enh Adam trùh ta Môise, rìm ngai òeq khoe oe enh qneq ka cwiàng da kan cachit, hloe xam mangai ùh broq òeq yiniq lui tiah ka yiniq lui da Adam, aih mangai ma broq dua òeq ka Mangai hu padon trùh.

¹⁵ Mahaq yiniq lui crài ka kan tabàih dech. Majah qmang aih, tàng joq taiq mòeq ngai raq ma broq yiniq lui mahaq mangai qnoeq ep cachit ataq, loq ka kan loq waq da Boc Plình xam kan am dech da haq canòm ajang mòeq ngai Chuaq Jesus khoe ùc bình halùih ka rìm ngai!

¹⁶ Èh hòh, kan am dech kô haq crài ka biac loh enh mòeq ngai ma broq yiniq lui: Mòeq yiniq lui raq, mahaq kan hadrah khoe taqmòq kan cachit, mahaq da kan am dech aih: atiq ka jò yiniq lui khoe bàc aih cadoe aràng am ka bèn kan taq ataq.

¹⁷ Majah qmang aih, tàng joq taiq yiniq lui da mòeq ngai raq kan cachit khoe jah wèq cwìang enh mangai aih, loq ka bài mangai jah ùh dìq ùh dài kan tabàih enh Boc Plình xam kan am dech da kan taq ataq, wì haq jah canòm ka mòeq ngai Chuaq Jesus Christ ðòeq jah cwìang ta kan rìh yeo hnau ka aih hòh!

¹⁸ Qmang aih, taiq mòeq yiniq lui raq kan hadrah baxa khoe taqmòq ka rìm ngai qmang leq, hadai qmang aih mòeq ngai raq broq taq ataq, kan taq ataq aih am kan rìh hadai jàp ka rìm ngai.

¹⁹ Majah qmang aih, taiq kan ùh iu da mòeq raq, dài mangai qnoeq dìq loh dǝng ðeh mangai i tuiq, hadai qmang aih dìq, taiq kan loq iu da mòeq ngai raq dài mangai qnoeq dìq loh dǝng mangai taq ataq.

²⁰ Ranenh khoe plah raðeh taqne, dòq yiniq lui èh rai bàc, mahaq taleq yiniq lui khoe rai bàc, ta aih kan tabàih dech bàc yeo hnau hòh,

²¹ qmang aih, yiniq lui wèq cwìang ta kan cahit qmang leq, kan tabàih dech wèq cwìang ta kan taq ataq hanoh qmang aih ðòeq hu am kan rìh halình

mòeq òe enh dalam ka Jesus Christ aih Chuaq bèn.

6

Cachit ka yiniq lui Rih hlai enh dalam Jessus Christ

¹ Qmang aih bèn oe anoe qmang leq hòem? Ajoq bèn oe catàm yôt ta yiniq lui dôq kan tabàih dech jah ùh dìq ùh dài qmòh?

² Ùh lòm qmang aih, bèn khoe cachit ka yiniq lui, ji lai q bèn ma oe rih ta yiniq lui hòem?

³ Ahiaq oh daq ùh qnì, dìq dõng ka bèn khoe jah baptem enh dalam ka Chuaq Jesus Christ, aih baptem enh dalam kan cachit da haq qmòh?

⁴ Bèn khoe jah catùh ti haq xi baptem enh dalam kan cachit haq, òe eq tiah ka Chuaq Jesus Christ canòm kan ranhòm enh nòe Baq jah rih hlai enh kan cachit qmang leq, bèn hadai jah rih hlai ta kan rih maneo qmang aih.

⁵ Tàng joq bèn khoe pajùm mòeq ti haq ta kan cachit qmang ka haq, aih èh joq qnàng bèn hadai jah pajùm mòeq ti haq ta kan rih hlai tiah qmang ka haq:

⁶ Majah qmang aih bèn loq kon mangai dùnh da bèn khoe jah tiang talong pagat ti haq, dôq chac ma patih ka yiniq lui kô jah lùch đac dõng, aih èh bèn pi ep broq hapõng ka yiniq lui hòem.

⁷ Majah qmang aih, mangai leq khoe cachit haq aih khoe jah claih ka yiniq lui.

⁸ Manoèq kô, tàng joq bèn khoe cachit ti Christ, bèn loq aih èh rađeh hadai jah rih hlai ti haq,

⁹ majah qmang aih bèn loq, pang jò Chuaq Jesus Christ khoe rìh hlài enh kan cachit, haq pi cachit hòm, kan cachit pi i cwìang cleq enh qnhèq ka haq hòm.

¹⁰ Haq cachit aih cachit ka yiniq lui, cachit mòeq yàng am ka diq dǝng, mahaq manǝeq kô haq rìh aih rìh ka Boc Plình.

¹¹ Hadaì qmang aih diq, oh daq drah ngan raǝh hadaì khoe cachit ka yiniq lui mahaq rìh ka Boc Plình enh dalam ka Chuaq Jesus Christ.

¹² Apa q dôq yiniq lui oe i cwìang cleq ta chac hamac ma loq cachit da oh daq, apaq tiaq trong haq ma ònh.

¹³ Apa q dèch chac hamac cla am ka yiniq lui, ðòeq broq ranac patìh ka kan dù, mahaq drah dèch chac cla oh daq ka Boc Plình qmang ka mangai khoe cachit mahaq manǝeq kô khoe rìh hlài, dèch rìm yiniq ta chac cla am ka Boc Plình ðòeq broq ranac patìh am ka kan taq atoq.

¹⁴ Majah qmang aih yiniq lui ùh i cwìang cleq ta oh daq; taiq oh daq pi i oe enh qneq ka ranenh mahaq oe enh qneq kan tabàih dech.

¹⁵ Khoe aih qmang leq! Taiq bèn pi oe enh qneq ka ranenh, mahaq oe enh qneq ka kan tabàih dech aih èh bèn khòh broq yiniq lui qmòh? Ùh qmang aih!

¹⁶ Oh daq ma ùh loq! tàng joq oh daq khoe dèch cla raǝh ðòeq hu iu tiaq cabô, aih axài broq ðic mangai bèn ma iu, broq ðic da yiniq lui ajèn trùh ta kan cachit loq broq ðic da kan loq iu ðòeq hujah kan taq atoq?

¹⁷ Mahaq manè apôì Boc Plình, majah qmang aih atìq ka oh daq broq ðic ka yiniq lui, mahaq

manòeq kô khoe dìq ka manoh wìh hlài iu tiaq
Trong ma khoe hnài ðòeq broq maneh ka raðeh!

¹⁸ Qmang aih oh daq khoe claih enh yiniq lui,
khoe jah wìa hapõng kan taq atoq.

¹⁹ Au anoe troeq bàu wì maloq doe, majah
qmang aih kon mangai da oh daq ùh i nèn cleq.

Qmang aih oh daq khoe hmaq ðòeq dèh chac
hamac broq hapõng díc kan amùa ratauq broq
dù qmang leq, manòeq kô oh daq hadai dèch dèh
chac broq hapõng kan taq atoq qmang aih dìq.

²⁰ Jò oh daq oe raq broq díc ka yiniq lui, oh daq
ùh i tawac cleq ka trong taq atoq.

²¹ Aih oh daq jah cleq? Ajoq manòeq kô oh daq
jah toq kan camaih, majah qmang aih pulùch da
bài yiniq aih xài kan cachìt.

²² Mahaq manòeq kô oh daq khoe jah claih enh
yiniq lui khoe jah wìa hapõng Boc plình, aih oh
daq jah yõc ka raðeh kan hadròeh ðòeq pulùch
èh jah kan rìh halình mòeq ðòe.

²³ Majah qmang kan baha da yiniq lui aih kan
cachìt, mahaq kan am dech enh Boc Plình aih
kan rìh halình enh dalam ka Chuaq Jesus Christ,
Chuaq da bèn.

7

Jah claih

ka long ech Ranenh

¹ Oh daq ma ùh loq (Au doe ka mangai ma loq
ka ranenh) ranenh i cwiàng toq jò mangai oe rìh
qmòh?

² Tìah ka gucadrì i õng, waq toq õng haq oe rìh
pang leq, ranenh panan haq tiaq deh õng pang

aih, mahaq tàng ỡng haq cachit haq jah claih enh ranenh ma khoe kàt haq ti ỡng.

³ Qmang aih, tàng joq ỡng haq oe rih, mai haq lam yỏc mangai qnoeq, aih ep creo ka haq mangai gucadri tango, mahaq tàng joq ỡng haq khoe cachit, aih haq khoe claih ka ranenh, yac ka haq yỏc mangai qnoeq, haq ừ xài mangai tango.

⁴ Yôiq oh daq da au! oh daq hanoh qmang aih, xam chac da Christ oh daq hadai khoe cachit ka ranenh, đòeq hu jah yỏc mangai qnoeq, aih mangai ma khoe rih hlài enh kan cachit, dỏq bèn jah loh plì ka Boc Plinh.

⁵ Majah qmang aih jò bèn oe rih tiaq kan loq ònh da xech akia nẻh, ranenh khoe parẻu bài kan qmẻq tabroq ta chac bẻn dỏq loh plì ta kan cachit.

⁶ Mahaq manỏeq kỏ tiaq ranenh ma xan rùp padràng yỏt bẻn, bẻn khoe cachit, bẻn khoe jah claih khoe ka ranenh, đòeq hu patih ka Boc Plinh tiaq trong neo da Yiang Hadrẻh, pi oe tiaq trong dừnh da bàu achẻh.

Ranenh patỏ qnoh yiniq lui

⁷ Qmang aih bẻn oe anỏe cleq hỏm? Ranenh aih iẻq yiniq lui qmỏh? Joq ừ lỏm i qmang aih! Mahaq taiq ranenh au men jah loq dẻh ka yiniq lui, tàng joq ranenh ừ doe: “Ừ ừ khỏh daỉq”, aih au khoe ừ qnì ka kan daỉq.

⁸ Aih iẻq, yiniq lui khoe dahỏiq ajang ranenh đòeq xẻh qnoh bài kan loq ònh daỉq ta cliac au: Ừ hỉa q i ranenh, aih yiniq lui cachit.

⁹ Nẻh haq, qnhỏq i ranenh aih au rih, yàng jò ranenh hỉ trửh aih yiniq lui rih, au loh ka cachit glỏq hỏm.

¹⁰ Au ma hi hnoq, lêh gêh haq ranenh ðoèq broq ka au rih, cadoe tìc aràng au trùh ta kan cachit.

¹¹ Majah qmang aih yiniq lui khoe dahôn yôc ranenh ðoèq hu padô au, ti ajang aih raq au majah cachit.

¹² Qmang aih, ranenh aih hadròeh, bàu thê hanoh hadròeh, ðiq lem rai taq atoq.

¹³ Wùih kan lem qmang aih khoe loh nen dôq au cachit qmòh? Ûh lòm i qmang aih! Mahaq yiniq lui ma khoe broq ka au cachit, haq yôc kan lem broq au cachit, ðoèq haq jah patô raðeh aih yiniq lui, aih iq yiniq lui cachat ajang ranenh majah loh ka xòc ðiq jaq.

Ranenh xam yiniq lui tablêq ka dabau enh dalam chac mangai

¹⁴ Bèn loq ranenh aih yiang, mahaq manoh da au kô aih xech akia, khoe tech ðoèq broq ðic ka yiniq lui.

¹⁵ Majah qmang aih, au ùh qnì ðeh broq cleq: Au ùh lòm broq trong cla ma enh, mahaq broq toq trong cla ma git.

¹⁶ Mahaq tàng au broq trong au ma git, aih au canau loq ranenh joq qnàng lem.

¹⁷ Jò aih au mahi loq, ùh xài au broq ðài yiniq aih, mahaq yiniq lui rih oe enh dalam ka au.

¹⁸ Au loq kan lem ùh oe ta au, aih iq rameh: haq ùh oe ta manoh au, majah qmang aih au enh broq trong lem mahaq ùh hlàt broq ka gêh;

¹⁹ au ùh broq trong lem au ma enh, mahaq broq trong qmèq cla ma ùh enh.

²⁰ Manòeq kô tàng joq au broq trong au ùh enh, aih pi xài au broq mahaq yiniq lui ma rìh oe enh dalam ka au ma broq trong aih.

²¹ Qmang aih au hnoq i ranenh kô enh dalam ka au: Jò au enh broq trong lem, kan qmèq hatiaq hloe au jò aih raq.

²² Majah qmang aih tiaq kon mangai enh dalam, au lem bùi ka ranenh Boc Plình;

²³ mahaq au loq dèh ta chac i mòeq ranenh qnoeq tablêq ka ranenh ta gàu au, panan thê au broq hapõng ranenh da yiniq lui, aih ranenh ma qnang tabroq ta chac au.

²⁴ Joq haõo ka au! Cabô mahu dèch au claih khoe ka chac hamac loq cachit kô èh?

²⁵ Manè apôi Boc Plình, canòm ka Chuaq Jesus Christ, aih Chuaq da bèn! Qmang aih, cla au yõc dèh gàu ngoc patìh ka ranenh da Boc Plình, mahaq xech akia au broq hapõng dicit ka ranenh da yiniq lui.

8

Rìh enh dalam kaYiang Hadròeh

¹ Qmang aih, manòeq kô khoe pi i kan hadrah ka mangai oe ta Chuaq Jesus Christ;

² majah qmang aih ranenh da Yiang Hadròeh kan rìh khoe canòm ka Chuaq Jesus Christ òeq cagnaih au loh khoe ka ranenh da yiniq lui xam kan cachit.

³ Majah qmang aih yiniq cleq ranenh ma ùh hlàt broq, taiq xech akia broq ka ranenh loh ka pi nèn, aih Boc Plình khoe broq: Taiq yiniq lui haq majah khoe thê dèh kon yõc xech akia qmang ka xech

akia yiniq lui da bèn, èh khoe hadrah yiniq lui ta xech akia aih,

⁴ dôq kan taq atoq da ranenh ma panan broq jah gèh enh dalam bèn, aih la bài mangai ma ùh tiaq dua da xech akia mahaq tiaq dua da Yiang Hadròeh.

⁵ Mangai rìh tiaq xech akia gàu ngoc wì haq haqmiang chaq toq trong xech akia ma enh, mangai rìh tiaq Yiang Hadròeh manoh haq haqmiang chaq toq trong daYiang Hadròeh.

⁶ Chaq toq trong da xech akia enh aih èh loh kan cachit, chaq trong Yiang Ha droèh aih èh loh kan rìh xam kan catèm.

⁷ Majah qmang aih haqmiang chaq toq trong da xech akia aih tablêq hlài ka Boc Plình, majah qmang aih haq ùh tiaq ranenh da Boc Plình, yeo hnau ka aih hòm haq tiaq ùh jah.

⁸ Bài mangai rìh tiaq xech akia, ùh jò leq lem ka manoh Boc Plình.

⁹ Hnoq anoe qmang aih, tàng joq Yiang Hadròeh da Boc Plình rìh oe enh dalam oh daq, oh daq ùh rìh tiaq xech akia hòm mahaq rìh tiaq Yiang Hadròeh, tàng cabô ùh i ka Yiang Hadròeh da Christ, aih ùh xài mangai da haq.

¹⁰ Qmang aih, tàng joq Christ oe enh dalam oh daq, yac ka chac oh daq cachit ka yiniq lui, mahaq yiang aih rìh taiq kan taq atoq.

¹¹ Èh hòm, tàng joq Yiang da Boc Plình ma khoe broq ka Chuaq Jesus rìh hlài enh kan cachit oe ti oh daq. Haq ma broq ka Chuaq Jesus rìh hlài enh kan cachit aih hadai canòm ka Yiang da haq ma oe ta dalam oh daq đòeq broq ka chac mac ma loq cachit da oh daq jah rìh hlài.

¹² Qmang aih, diq ka oh daq bèn pi oe pòq doèh xech akia òòeq hu rìh tiaq haq.

¹³ Joq qmang aih, tàng joq oh daq rìh tiaq xech akia, aih èh ep cachit, mahaq tàng canòm ka Yiang Hadròeh òòeq haq broq cachit dõng bài kan qmèq da chac hamac aih èh oh daq rìh.

¹⁴ Majah qmang aih, diq dõng mangai leq i Yiang Hadròeh da Boc Plình qnung trong, aih diq kon Boc Plình.

¹⁵ Yiang Hadròeh oh daq ma khoe jah aih ùh dõq oh daq broq hapõng díc òòeq rìh ta kan yùq crè hòh, mahaq khoe am ka oh daq jah i manoh da kon ban, canòm ajang aih bèn mahi jah creo: "Aba- Baq!"

¹⁶ Yiang Hadròeh raq ma khoe panhìn ta manoh bèn loq òeh kô kon Boc Plình.

¹⁷ Manoèq kô, tàng joq bèn kon Boc Plình, aih bèn hadai mangai wiang jah kùng hang. Mangai wiang jah kùng hang enh Boc Plình, mangai wiang jah kùng hang ti Christ, waq toq bèn hadai wiang nanxa ti haq, aih èh bèn hadai wiang jah kan ranhòm ti haq.

Kan ranhòm tangèa èh

¹⁸ Au hèm, kan nanxa manòeq kô ùh tajì òòeq hu tawèh ti kan ranhòm padon trùh ta bla èh, aih la bài kan ranhòm hu padon qnoh am ka bèn.

¹⁹ Joq qnàng qmang aih, rìm yiniq diq toq tangèh gòm hnoq bài kon Boc Plình jah paqnoh.

²⁰ Majah qmang aih, rìm yiniq Boc Plình broq loh diq khoe oe enh qneq ka kan cachit lùch, ùh xài cla enh qmang aih mahaq enh Mangai ma broq loh bài yiniq aih.

²¹ Rìm yiniq khoe jah broq loh aih hadai tangèh ka raðeh jah dèch claih khoe ka kan cachit lùch, ðòeq hu hanoh jah oe ta kan ranhòm ti kon Boc Plinh.

²² Bèn loq rìm yiniq hadai toq hràng xalep trùh mandeq;

²³ ùh xài toq bài ngè khoe jah broq loh aih, mahaq xam bài bèn aih bài mangai ma i plì ramua da Yiang Hadròeh, hadai hràng ta manoh cliac, jò bèn qnang gòm ðòeq hu jah broq kon ban, aih la kan baxon hlài chac hamac bèn.

²⁴ Ta kan tangèh gòm kô raq bèn ma khoe jah dèch, jò wì khoe jah trong raðeh ma tangèh gòm, aih ma oe tangèh cleq hòh, bèn khoe jah hnoq aih oe tangèh gòm dèh hòh?

²⁵ Mahaq tàng bèn tangèh yiniq ðeh qnhòq hnoq, aih ajoq bèn gòm qmòe rai àt,

²⁶ Hadai qmang aih, Yiang Hadròeh wiang da bèn trong ma ùh nèn. Bèn ùh qnì ka raðeh ep bòch cleq ðòeq waiq khàn ka hatroq, mahaq Yiang Hadròeh yòc kan pì atêh hràng enh bèn ðòeq hu waiq khàn am ka bèn.

²⁷ Mangai ma sreo ta manoh mangai loq ka manoh Yiang Hadroèh, aih la tiaq manoh Boc Plinh enh haq ma waiq khàn am ka bài kon da Boc Plinh.

²⁸ Bèn loq rìm yiniq Boc Plinh ma broq aih ðìq ðòeq jah lòeq ka bài mangai loq waq ka haq, aih bài mangai haq ma khoe ðì dèh adroe.

²⁹ Majah qmang aih, mangai haq ma khoe loq dèh adroe, haq khoe ta qmroq ðòeq hu jah tìah ka Kon Haq, dōq Kon aih jah broq Kon ramua oe taqne oh

daq;

³⁰ mangai haq ma khoe ta qmroq dèh adroe, aih haq khoe creó, mangai haq khoe creó, aih haq khoe doe dèh mangai taq atoq, mangai haq khoe doe dèh taq atoq aih haq khoe broq dôq jah kan ranhòm.

³¹ Khoe qmang aih bèn doe qmang leq? Tàng joq Boc Plính wiang ti bèn, oe i cabô hu tablêq ka bèn?

³² Haq khoe ùh adênh dèh Kon cla, mahaq khoe am dõng ka bèn, oe i cleq hòmh haq ma ùh am hloe ka bèn ajang Kon aih?

³³ Cabô ma aràng kan tah hadrah ka mangai Boc Plính ma khoe ràih dèh? Boc Plính aih Mangai ma doe dèh wì aih jah kan taq atoq.

³⁴ Cabô ma taqmòq yiniq lui ka wì aih? Ùh i ka cabô. Chuaq Jesus Christ aih Mangai khoe cachìt, manoeq khoe rìh hlài, haq qnang haqngui enh qma Boc Plính òdeq waiq khàn ka bèn.

³⁵ Cabô jah lah bèn loh khoe kan loq waq da Christ? Kan mangò, kan nanxa, kan canàt rùp, pangot hrah, hyah hyai, kan yat, chang jaoq ùh xài?

³⁶ Qmang ka bàu khoe achìh:

“Tiaq Ìh, nhèn glàm kan cachìt xèq ka hì, Wì ngan nhèn bu dàng triu òdeq xah jam”.

³⁷ Mahaq ùh xài, ta rìm yiniq aih bèn canòm ka Mangai ma loq waq ka bènThi Tv 44:22, òdeq jah blêq yeo hnau ka aih hòmh.

³⁸ Au cajap manoh rameh: Yac ka kan cachìt, kan rìh, yac ka bình plính, yac ka kiác dù, yac ka mangai i cwìang, yac ka manòeq, yac ka yiniq padon trùh ta bla èh,

³⁹ kan haqnèq kan jrùq, ùh i cleq jah lah bèn loh khoe ka kan loq waq Boc Plình khoe am ka bèn oe enh dalam ka Chuaq Jesus Christ, aih Chuaq da bèn.

9

Phaulô loq waq ka mangai Isorali

¹ Enh dalam ka Christ, au ùh qnùt, manoh cliac au hadai wiang panhìn ka au xam Yiang Hadròeh:

² Au mangò pì cajaq, manoh au jò leq ma ùh jìq.

³ Au khoe hmaq ngèh dôq au chiùq dìq kan wì git, dôq au kô dahlêh khoe ka Christ thai ka oh daq ma pajùm mahim jan ka au,

⁴ aih la mangai Isorali, aih bài mangai jah broq kon ban da Boc Plình, jah kan ranhòm, bàu tajao, ranenh, jah kùh waiq xam bàu khoe tèu am;

⁵ aih bài mangai ha-uang loh enh wì kan cadraq tiaq mahim jan aih raq nang noe ha-uang qnoh Christ, aih Mangai enh qnhèq dìq dǒng rìm ka yiniq, aih raq Boc Plình mã khòh manè apôi mòeq òe Amen.

⁶ Aih ùh xài bàu Boc Plình khoe loh ka qngwan qngwaiq. Majah qmang aih ùh xài mangai leq ha-uang loh enh nang noe Isorali aih dìq mangai Isorali.

⁷ Èh ùh xài hi loh enh nang noe da Apraham aih dìq kon haq, mahaq i bàu achìh: “Enh Ysac aih èh ìh men i mòeq nang noe creò tiaq yiniq ìh”;

⁸ bàu aih rameh: Kon kaiq enh xech akia aih ùh xài kon Boc Plình, mahaq kon da bàu haq khoe tèu òe deq dèh adroe aih men joq kon da Apraham.

⁹ Kô raq bàu ma khoe chôn̄h doe đoēq adroe: “Kô èh jah mỏēq hanam, Au hi wih hlài tacô, èh Sara hi i kon calô”.

¹⁰ Ma xài toq aih hi dĩa, da Rêbeca hòm jò haq hadrâp kon camia, kon da Ysac kan cadraq bèn, hanoh qmang aih.

¹¹ Majah qmang aih, jò wa kon qnhòq ha-uang loh, qnhòq i broq trong lem trong dù dĩa hu jah cajap tiaq manoh Boc Plinh ma khoe di adroe tiaq manoh cla haq enh (ùh xài tiaq yiniq broq, mahaq tiaq manoh Mangai ma creo)

¹² aih khoe i bàu doe ka miq wa kon qyoh: “Mangai ma daq ep broq hapõng dèh oh”;

¹³ qmang ka bàu khoe achih: “Au ha-och ka Jacôp, mahaq git ka Êsau”.

¹⁴ Qmang aih bèn anoe qmang leq? Ahiaq i kan ùh taq atoq ta Boc Plinh? Ûh i qmang aih!

¹⁵ Majah qmang aih, haq doe ka Môise: “Au ha-och deh ka mangai au loq waq, Au ùh manaq deh ka mangai au ma ha-och”.

¹⁶ Trong aih ma xài cabô hi tangèh hi àu hi jah, mahaq oe ajang kan loq waq da Boc Plinh.

¹⁷ Ta Hset Hadroèh hadai i doe ka Pharaôn: “Hagleq au majah khoe dèch paqnàng ìh, đoēq ajang aih hujah patô qnoh cwiang itai au, dĩa yiniq au jah anoe jàp crõng taneh”.

¹⁸ Qmang aih, Haq ha-och deh ka mangai haq enh ha-och, enh broq cadoq manoh bô haq broq.

¹⁹ Qmang aih ìh bóch au: Hagleq Boc Plinh oe cwò dèh ka nhèn? Oe i cabô hlàt tablêq ka manoh haq enh qmòh?...

20 Mahaq ìh qmat cabô, ìh ma hùà rahen ka Boc Plình? Abôq tanèh wìa ka tarahen ka mangai broq loh abôq: “hagleq ìh majah broq loh au qmang kô?”

21 Mangai thòq mốt tanèh ma ùh xài haq i cwìang yeo hnau ka tanèh, hadai tanèh aih qnah haq broq loh abôq lem òòeq hu tah hang canaq, qnah haq broq òòeq hu tah dahwèq hwòt hwat qmòh?

22 Tàng joq Boc Plình enh am hnoq deh kan nòeh rai broq òòeq hnoq kan cwìang itai haq, mahaq haq àt deh manoh khoe dùnh am ka bài abôq ma troq toq ka nòeh troq ka raliang cađac,

23 haq broq qmang kô am ka bài abôq haq ma loq waq, haq ma khoe palauq òòeq ka wì jah hnoq kan padrông ranhòm da haq, aih bèn oe jah anoe tam cleq hòmh?

24 Aih au anoe trùh bèn, bài mangai haq khoe creò deh, ùh xài toq ta mangai Judà, mahaq hloe xam bài mangai diac wì.

25 Qmang ka haq anoe ta hset Ôse:
“Mangai ùh xài da au, au creò deh mangai da au, Mangai au ùh ha-och, au doe deh mangai au ha-och;”

26 Èh hòmh, tanoè haq ma doe ka wì: “Pì ùh xài mangai da au,
Hadai ta aih raq wì ma hi jah creò kon Boc Plình halình mòeq òòeq”.

27 Da Êsai jò haq ràu trùh mangai Isorali, haq creò rai hmoe cadêh: “Yac ka mangai Isorali bàc tìah ka braih diac rasixq, mahaq toq rah ròp da haq majah dèch;

²⁸ majah qmang aih Boc Plình haqnan ka broq dôq xit rìm bàu haq ta crông taneh.

²⁹ Èh hòm Êsai khoe doe:

“Tàng Boc Plình òi jaq haqnèq, ùh rong ðòeq ka nang noe bèn mòeq toq hamǒng,

Aih bèn hadai khoe tìah ka Sôđôm tìah ka Gômôro ðiq”.

³⁰ Aih èh bèn doe cleq hòm? Mangai diac wì ùh chaq kan taq atoq, aih khoe jah kan taq atoq, mahaq kan taq atoq loh enh manoh lùì;

³¹ mangai Isorali chaq ranenh da kan taq atoq, ðiq khoe capòch ka ranenh aih.

³² Hagleq? Taiq wì haq ùh chaq xi manoh lùì, mahaq chaq xi yiniq broq. Wì haq khoe catoeh ka hmo,

³³ qmang ka bàu khoe achìh:

“Kô! Au ðòeq ta Siôn mòeq toq hmo, aih hmo kàn broq ka wì catoeh, mangai leq lùì haq, ùh hìaq ep camaih.

10

Mangai Juda khoe cađac kan taq atoq da manoh lùì EsIs 28:16

¹ Wùih ðiq ka oh ðaq, kan tangèh ta manoh au hloe xam bàu au waiq khàn ka Boc Plình, au waiq khàn deh ka oh ðaq au, aih la mangai Isorali ðòeq ðiq ka wì jah dèch.

² Au wiang capoch panhìn wì haq joq i manoh nhet joq qnàng trong da Boc Plình mahaq kan nhet aih ùh tiaq manoh rabiaq.

³ Majah qmang aih, wì haq ùh canau kan taq atoq da Boc Plình wì haq àu chaq ònh ðeh trong

qnoeq ðòeq broq ka raðeh jah taq atoq, ùh iu tiaq kan taq atoq da Boc Plình;

⁴ majah qmang aih, Christ aih kan atiq lùch da ranenh, ðòeq ðiq ka mangai lùì hujah kan taq atoq.

⁵ Anoe trùh kan taq atoq loh enh ranenh, Môise achìh qmang kô: “Bàì mangai leq ma broq tiaq trong aih, canòm dèh aih raq ðòeq hujah rìh”.

⁶ Mahaq kan taq atoq da manoh lùì, aih achìh rameh: “Manoh ìh apaq capoch qmang kô: Cabô ma tóç ta Plình? ðòeq hu qnoh Christ loh;

⁷ tàng ùh aih: Cabô ma hu loh ta hwin jrùq ðòeq hu dèch atóç Christ enh kan cahìt”?

⁸ Mahaq doe qmang leq? Bàu oe ten ka ìh, oe ta hacùng ìh, oe ta manoh ìh. Aih raq bàu da manoh lùì nhèn qnang anoe hnài.

⁹ Qmang aih tàng joq hacùng ìh anoe qnoh Chuaq Jesus Christ, manoh ìh lùì Boc Plình khoe broq ka haq rìh hlài enh kan cachìt, aih èh ìh jah dèch;

¹⁰ majah qmang aih, lùì ta manoh aih jah kan taq atoq, mahaq anoe qnoh ajang hacùng bàu aih èh jah dèch.

¹¹ Qmang ka Hset Hadròeh anoe: “Mangai leq ma lùì haq, aih ùh hìaq xep.

¹² Majah qmang aih yac ka mangai Juda yac ka mangai Gorec ùh i cleq crài ka dabau. Wì hanoh i pajùm mòeq Chuaq bình halùih xôq ramot ka mangai creo dang haq.

¹³ Majah qmang aih, mangai leq creo dang yiniq Chuaq, aih hì jah dèch.”

¹⁴ Mahaq, wì qnhòq lùì haq, aih wì creo dang qmang leq majah? Qnhòq lah i cabô anoe trùh

haq aih broq qmang leq wì ma lùì? Èh broq qmang leq wì ma hìa tàng joq ùh i cabô lam doe ka wì?

¹⁵ Mahaq tàng ùh i ka mangai ma khoe jah thê loh lam, aih èh hnài qmang leq? Tìah ka bàu ma khoe achìh: “Capiang jènh da bài mangai aràng Bàu lem, aih lem i jaq clceq”.

¹⁶ Mahaq ùh xài rìm ngai òiq lùì Bàu lem, majah qmang aih Êsai khoe doe: “Waiq Chuaq! cabô ma lùì bàu nhèn anoe?”

¹⁷ Qmang aih, manoh lùì trùh, jò wì hi jah tàng, wì jah tamàng jò bàu da Christ jah anoe hnài.

¹⁸ Mahaq au bòch: Ahìaq wì qnhòq tàng? Majoq qnàng wì khoe tàng:

“Bàu wì anoe khoe trùh rìm cròng,
Bàu wì khoe jàp crống taneh”.

¹⁹ Au bòch hòm: “Tàng qmang aih mangai Isorali ùh lòm qnì cleq qmòh? Môise khoe doe:

“Au broq ka pì tagrình ka mangai diac wì;
Au broq ka pì plòh nòeh ka mangai ùh qnì qmoè cleq”.

²⁰ Êsai khoe ùh yùq ka anoe:

“Bài mangai ma ùh chaq au, aih khoe hnoq au,
Au mahno rađeh ka mangai ma ùh lah bòch trùh au”.

²¹ Ràu trùh mangai Isorali aih haq doe: “Au khoe hnhu tì xèq ka hì tangèa ta nang noe ma cadoq manoh loq capoch gôpla”.

11

Nang noe Isorali

¹ “Khoe aih au hòch hòm: Boc Plình i cađac dèh mangai da haq? Ùh i, majah qmang aih; au hadai

mangai Isorali, kon xau Apraham, nang noe da Bêjamin.

² Boc Plình qnhòq hmaq cađac dèh mangai haq ma khoe loq deh adroe. Oh đaq ma ùh qnì ajang noè Hset Hadròeh ma achìh trùh Êlì? Jò haq àu bòch waq ka Boc Plình tabroq ka mangai Isorali, haq doe:

³ Waiq Chuaq! wì khoe jêh đac đong da ìh pajàu, raliang caqnìh đac da ìh prang tadreo; oe mòeq ngai au raq, dua wì chaq jêh đac hloe”.

⁴ Mahaq Boc Plình têu qmang leq? “Au khoe padon đòeq ka rađeh tapèh mùan mangai gualô ùh hacùn cràng enh ngèa ka Ba-an.

⁵ Manòeq hadai, i mòeq qnah oe xrong hlài tiaq kan tabàih ma ràih dèh.

⁶ Mahaq tàng joq hi tiaq kan tabàih dech aih pi tiaq trong yiniq broq hòh, ùh qmeh kan tabàih ma oe xài kan tabàih hòh?

⁷ Aih qmang leq? Aih iq mangai Isorali chaq ùh jah trong wì haq ma chaq, mahaq mangai majah ràih aih khoe jah, mangai ma qnoeq aih loh ka cadoq manoh,

⁸ qmang ka bàu ma khoe achìh:

“Boc Plình khoe broq ka wì loh ka clam cluiq, Mat ùh xau hnoq, don ùh xau tàng, Trùh hloe manòeq”.

⁹ Đawit hanoh doe:

“Xoeq diq, yiniang yinàng da wì haq wìa jroh wìa hláp,

Wìa kan catoeh đòeq hu patem chau ka wì haq;

¹⁰ Xoeq diq mat wì haq loh ka clam cluiq, đòq wì haq ùh xau hnoq, Crống wì haq kốc hloe mòeq đòe”!

Mangai Isorali tacro, dôq mangai diac qnoeq jah dèch

¹¹ Au bòch hòm: Mangai Isorali catoeh qmang aih ahiaq òòeq hu cro hloe ùh xài? Ùh xài qmang aih! Mahaq taiq yiniq lui wì haq kan dèch majah khoe trùh ka mangai diac wì, òòeq broq ka wì haq tagrình.

¹² Mahaq tàng yiniq lui wì haq khoe broq ka crông tanèh jah kan padrông, kan capòch da wì haq khoe broq ka mangai diac wì jah padrông kan, loq ka kan padrông da wì haq!

¹³ Au anoe ka pì oh daq mangai diac wì: Enh nèh trùh manòeq, au broq mangai Tiaq Cla am ka mangai diac wì, au àu broq dôq trong au ma patìh jah ranhòm,

¹⁴ òòeq ka manoh cliac oh daq mangai diac cla nhèn tajènh, dôq wì loq ran ðeh diq, òòeq i ðeh moeq qnah ngai ta wì haq jah dèch.

¹⁵ Tàng joq kan hlêh ðac da wì haq khoe broq ka phu crông jah hatroq, aih èh jò wì haq wìh hlài ta kan tabàih dech, aih ma ùh xài rìh hlài enh kan cachit qmòh?

¹⁶ Tàng plì gàu mùa hadròeh, aih diq ka ðùng hanoh hadròeh, tàng riah haq hadròeh, aih diq ka hanènh hanoh hadròeh.

¹⁷ Tàng i mòeq baiq hamènh ma khoe sri ðac, aih èh ìh qmat long ôliu gàng khoe jah srep qmùt ajang bài teu hamènh aih òòeq jah pajùm ðeh ka jan, ðeh ka riah da long ôliu,

¹⁸ apaq catèh raðeh kô yeo loe ka bài hamènh aih. Tàng joq loq enh catèh, ìh ep hèm qmang kô: Ùh xài ìh tagah lep ka riah, ma joq qnàng riah ma

tagah lep ka ìh.

¹⁹ Aih èh ìh hi doe: Bàì hamenh qnoeq khoe sri đac đòeq ka au jah srep qmùt ajang teu bàì aih.

²⁰ Joq qmang aih, bàì hamenh aih khoe sri cađac taiq wì haq ùh lùì, ìh canòm ka manoh lùì majah keo oe, apaq catèh rađeh mahaq the ìh loq iu yùq.

²¹ Majah qmang aih tàng joq Boc Plình khoe ùh adènh ka bàì hamenh cla long aih, aih èh haq hadai ùh i adènh cleq ka ìh.

²² Qmang aih, ngan beq, ngan kan loq hanò xam kan ùh jah blìa da Boc Plình: Kan ùh jah blìa ka wì aih bàì mangai khoe tacro, kan loq hanò am ka ìh, waq toq ìh loq wèq rađeh ta kan loq waq da haq, ùh meh ìh hadai ep sri cađac.

²³ Da wì aih, tàng wì ùh hìaq catàm yôt ta kan ùh lùì, aih èh wì hadai jah srep qmùt majah qmang aih Boc Plình i cwìang srep qmùt wì haq.

²⁴ Mahaq tàng ìh khoe jah pot enh long ôliu gàng đòeq hu srep qmùt talong ôliu lem, aih loq ka bàì wì aih hamenh da cla long ma ùh jah srep qmùt ta xem cla qmòh!

Mangai Isorali èh dua jah dèch

²⁵ Qmang aih, au ùh enh ka oh daq ùh qnì kan hlèp kô, yùq èh oh daq loq doe đeh kô rabiaq: Aih ìq, mòeq qnah raq mangai Isorali ma khoe loh ka cadoq manoh, gòm trùh jò leq mangai diac wì khoe jah qmùt dōq haq tōm òeq;

²⁶ khoe aih èh dīq ka mangai Isorali hi jah dèch, qmang ka bàu khoe achìh:

“Mangai paclaih loh enh Si-ôn,

Dèch đac kan ngang dù loh khoe ka Jacôp;

27 Aih kan tajao au broq ka wì,
Jò au dèch cađac ka hangai yiniq lui wì haq”.

28 Tàng hatuàng trùh Bàu lem, wì aih khoe loh mangai tagit ka pì, mahaq tàng hatuàng trùh kan ràih enh plình wì haq aih raq mangai jah kan loq waq taiq ajang boc yaq,

29 majah qmang aih bài biac Boc Plình ma am xam bàu creo da haq ùh jò leq tablòq.

30 Qmang ka enh adroe nèh oh daq khoe ùh iu Boc Plình, yàng manòeq kô taiq kan ùh iu da wì aih oh daq ma khoe loh ka jah kan ha-och,

31 hanoh qmang aih, manòeq kô wì haq khoe ùh iu, ðòeq hu hadai jah kan ha-och troeq kan ha-och khoe am da oh daq.

32 Majah qmang aih, Boc Plình khoe clêh ðìq ðõng ta kan ùh qnì iu ðòeq hu ha-och ðìq ðõng rìm ngai.

33 Wùih! joq jrùq qnàng kan padrõng, kan rabiaq, kan loq da Boc Plình! Kan hadrah da haq cabô ma hlàt tem, trong da haq cabô ma hlàt qnhro!

34 Aleq i cabô loq ka manoh da Chuaq? Cabô ma khoe wiang hatình ti haq?

35 Cabô khoe am ka haq cleq adroe ðòeq hu jah haq padreo hlài?

36 Majah qmang aih rìm yiniq ðìq loh enh haq, canòm ka haq, tangèa ðìq ta haq. Kan ranhòm mòeq ðòe ùh lùch oe ðìq ðõng ta haq! Amen.

12

Dèch rađeh ka Boc Plình

¹ Qmang aih, au yǒc kan loq waq da Boc Plính, pariaq òiq ka pì oh òaq dèch qmòe chac cla pì òòeq broq ramènh rìh, hadròeh lem ka manoh Boc Plính, aih raq kan kùh waiq ma troq da oh òaq.

² Apa q top dua qnhòng kô, mahaq wìh wìa tiaq manoh oh òaq ma khoe jah paneo, òòeq hujah qnhro loq trong lem manoh xam kan geo gùa da Boc Plính aih qmang leq cadèh.

³ Qmang aih, tiaq kan tabàih dech ma khoe am ka au, au anoe ka tang ngai oh òaq apa q hèm raðeh kô haqnhèq hrìn, mahaq ep i manoh hèm bu qnang lem tiaq maneh kan lùì Boc Plính ma khoe am ka tang ngai.

⁴ Majah qmang aih, tìa q ka mòeq toq chac raq mahaq ta aih i bàc yiniq, bàì yiniq aih i deh hra trong abroq crài ka dabau;

⁵ hadai qmang aih, enh dalam ka Christ bèn kô bàc ngai mahaq khoe loh mòeq chac, bàì bèn kô aih hamen da dabau.

⁶ Majah qmang aih bèn i bàì kan tabàih crài ka dabau, tiaq kan tabàih dech khoe am ka tang ngai, mangai leq jah am tapoch pajàu, aih asràm tapoch hatiaq dèh manoh lùì;

⁷ cabô jah creo hu broq mangai patìh, aih ep kàt racop raðeh ti biac patìh, cabô broq mangai hnài, aih ep hnài;

⁸ cabô broq mangai pariaq, aih pariaq, cabô broq mangai ti tabàih am, aih tabòeh am majoq qnàng haq, cabô broq mangai qnung ngoe, panim haq òòeq hu qnung ngoe, cabô broq mangai loq ha-och, drah lem bùì ka broq.

Kan loq waq

⁹ Kan loq waq ep ma joq qnàng haq. Ep git ka trong dù bẻh trong lem.

¹⁰ Drah yỏc kan loq waq laq alàng ðòeq ha-och ka dabau tẻh ka oh ðaq, ngan wẻ qnoeq ùh hnau ka cla raẻh.

¹¹ Drah panim apaq aroh, ep i manoh loq nhet: ep patẻh ka Chuaq.

¹² Drah loq bẻi ta kan tangẻh, loq àt ta kan nanxa, cajap manoh ðòeq hu waiq khẻn.

¹³ Drah lah axong dahwẻq am ka mangai da Boc Plẻnh jẻ wẻ haq i ðẻh yiniq nhet ka waq, ðẻq ka manoh loq ðẻh tamoe;

¹⁴ waiq am xỏq ramot ka mangai rẻp oh ðaq, waiq am xỏq ramot ùh ðẻh hanẻp.

¹⁵ Wiang lem bẻi ti mangai lem bẻi, crẻ ti mangai crẻ.

¹⁶ Oh ðaq ep acaq oe ma hatroq ti dabau, apaq enh toq ka rahẻ rahẻm, mahaq loq haqmuan raẻh. Apaq ðoe ðẻh rabiaq.

¹⁷ Apaq yỏc kan ðẻ ðòeq hu patem chau ka cabỏ, mahaq enh ngẻa rẻm ngẻi, ep hẻm ngan trong leq malem.

¹⁸ Tẻng jah, yỏc ðẻq ðẻh ka padren hiwa ðòeq àu hatroq ka rẻm ngẻi.

¹⁹ Yẻi yẻi oh ðaq da au, cla pẻi apaq patem chau ka cabỏ, mahaq ðỏq ðẻq ka kan nẻh da Boc Plẻnh, majah qmang aẻh i bẻu khoe achẻ: “Kan patem chau aẻh oe ta au, i au tabroq chau.”

²⁰ Qmang aẻh tẻng joq mangai tagẻt ka pẻi haq hrah, qmẻi haq acaq, tẻng joq haq croh ranẻng, ðrah am haq ôq, broq qmang aẻh tẻh ka pẻi tah ngẻa ùnh tagẻu wẻi”.

²¹ Apaḡ dôḡ trong dù blêḡ pì, mahaḡ dôḡ trong lem blêḡ trong dù.

13

Loḡ iu mangai i cwìang

¹ Rìm ngai ep iu tiaḡ mangai wèḡ cwìang enh ḡnhèḡ ka raḡeh, majah ḡmang aih ùh i ka cwìang leḡ ma ùh trùh enh Boc Plình, bài cwìang aih òḡ Boc Plình thê.

² ḡmang aih, cabô taḡlêḡ hlài ka mangai wèḡ cwìang, aih haḡ taḡlêḡ hlài ka bàu Boc Plình khoe thê, mangai taḡlêḡ ḡmang aih haḡ taḡmac yôc ka raḡeh kan hadrah.

³ Majah ḡmang aih, mangai wèḡ cwìang ùh xài dôḡ ka mangai broḡ lem crè mahaḡ ðòeq ka mangai broḡ dù crè. Ìh ngèh ka ùh hìaq ep yùḡ crè ka mangai i cwìang ajoḡ? Aih draḡ broḡ trong lem beḡ ðòeq hujah wì haḡ manè baha ìh;

⁴ majah ḡmang aih wì haḡ aih hapôḡ Boc Plình ðòeq i lòeq ka pì. Mahaḡ tàḡ ḡh broḡ trong ḡmèḡ, aih khòh lèt, majah ḡmang aih mangai wê chang ùh lah wê waiḡ ùh i ka yiniḡ, wì haḡ aih ranac da Boc Plình ðòeq hadrah mangai broḡ dù.

⁵ Aih ìḡ dài majah ep iu, ùh xài crè toḡ ka loḡ phôc hi hêḡ, mahaḡ hadai taiḡ deh manoh cliac.

⁶ Aih ìḡ raḡ oh daḡ majah ep caḡnaiḡ thèḡ, majah ḡmang aih mangai wèḡ cwìang aih hapôḡ Boc Plình ðòeq hu broḡ trong kô.

⁷ Ep caḡnaiḡ da rìm ngai ðòeh oh daḡ ma khoe pòḡ: Caḡnaiḡ thèḡ ka mangai ìh ep thèḡ, wiang tagop ka mangai khòh wiang gop, crè ka mangai khòh crè, ta iu ka mangai khòh ta iu.

Thi Tv 19:4 Manoh loq waq aih broq gêh geo ranenh

⁸ Apağ pòq dòeh bô yac ka yiniq cleq, enh gùng kan loq waq ka dabau, majah qmang aih cabô loq waq dèh ka mangai ma haten hatia aih haq khoe broq gêh ranenh.

⁹ Hacô bài ranenh aih qmang kô: Ìh apağ tango, apağ jêh đac mangai, apağ atùng, apağ daiq plai hloe xam bài ranenh qnoeq, yac ka ranenh leq diq yùp ta mòeq bàu kô: Ìh ep loq waq ka mangai haten hatia tiah ka cla ìh.

¹⁰ Kan loq waq ùh broq habo ka mangai ten tia. Qmang aih kan loq waq broq gêh geo ranenh.

¹¹ Drah acağ oe qmang aih, majah qmang aih bèn loq manòeq: Khoe ten trùh jò, oh đaq ma kùi riu beq, majah qmang aih kan dèch da bèn trùh khoe ten, ùh hnau ka jò bèn ma baxèm lùì.

¹² Mang khoe jrùq, hì khoe ten trùh, qmang aih bèn drah lêh cađac bài yiniq broq da kan clam cluiq ðòeq hu taqmac wê ranac da kan qngah qngai.

¹³ Drah cadiang lam ma qnhrang qmang ka dahì. Apağ ðôq rađeh tacro catàm ta kan ôq bù haqnhròch, taliq talàn xam kan tajênh;

¹⁴ mahağ caxùnh yôc Chuağ Jesus Christ rai apağ hèm ðòeq chağ trong hu patih bài biac xech akia ma rahênh. XuXh 20:13-17 PhuĐnl 5:17-21

14

Mangai ma ùh nèn xam mangai ma tadêh

¹ Drah lem manoh òòeq hu òìh wì oh òaq manoh lùì ma yeo hamoq òeh, ùh dùh rahen òeh trong haq ma qnhòq òai lùì.

² Mangai kô lùì rìm yiniq òìq khòh acaq, mangai manoh lùì ma yeo òìaq tau acaq òeh toq cachìq.

³ Mangai acaq apaq jù òeh ka mangai ùh acaq, mangai ùh acaq apaq ti hadrah òeh ka mangai ma acaq, majah qmang aih Boc Plình khoe òìh yòc òeh haq.

⁴ Ìh qmat òìq cabô gleq ma hùà hadrah hapòng òa mangai qnoeq? Haq yòng qnì haq cro qnì aih mac òa òìà craq haq mahaq haq yòng, majah qmang aih Chuaq òì cwìang am ka haq qnhrang.

⁵ Managai kô hèm hì kô ùh hnau ka hì qnoeq, mangai tau hèm yac ka hì leq hanoh òaq òàng, mangai leq mangai meh lùì cajap òeh ta gàu ngoc.

⁶ Mangai ma wèq hì aih, òài Chuaq haq majah wèq, mangai ma acaq aih òài Chuaq haq men acaq, majah qmang aih wì haq manè àpôi Boc Plình, mangai ma ùh acaq aih hanoh òài Chuaq wì haq majah ùh acaq, wì haq hanoh manè àpôi Boc Plình.

⁷ Majah qmang aih taqne bèn kô ùh òì mangai leq rìh toq ka ràðeh, èh hòm taqne bèn hanoh ùh òì mangai leq ma cachìt ka ràðeh,

⁸ tàng bèn rìh aih rìh ka Chuaq, tàng bèn cachìt aih cachìt ka Chuaq. Qmang aih yac ka bèn rìh yac ka bèn cachìt, aih òìq ta Chuaq.

⁹ Christ khoe cachìt mahaq khoe rìh hlài aih òòeq hu broq Chuaq òa mangai cachìt xam mangai rìh.

¹⁰ Mahaq gleq òìh majah hadrah òeh oh òaq? Òa

ih hòm, hagleq ih loq jù đac dèh oh daq? Majah qmang aih, bèn kô èh dìq ep yòng enh ngèa ka gèq Boc Plinh haqngui hadrah bèn.

¹¹ Majah qmang aih i bàu khoe achìh rameh:

“Chuaq doe: Joq qnàng troeq au kô rìh halinh, rìm toq cràng dìq ep hacùn enh ngèa au, rìm toq rapet jah manè apôi Boc Plinh”.

¹² Aih èh, ajang ngèa Boc Plinh bèn dìq ep taqmon hlài rìm yiniq bèn ma khoe broq.

¹³ Qmang aih bèn pi dùh ti hadrah dèh ka dabau, yac ka qmang leq dua bèn ùh roh hmo ti qngèa oh daq, ùh broq ka wì haq tacro.

¹⁴ Au loq rai lùì joq qnàng ta Chuaq Jesus ùh i cleq ma ùh hruah, toq rameh raq cabô hèm dahwèq kô ùh hruah aih haq ùh hruah toq ka mangai aih.

¹⁵ Tàng joq mòeq dahwèq acaq ih broq ka oh daq ep mangò, qmang aih ih pi oe broq tiaq kan loq waq hòm. Ùh dùh òeq dahwèq acaq da ih broq raliang đac mangai Christ ma khoe cachìt am.

¹⁶ Qmang aih apaq dôm i yiniq cleq ih loq haq lem mahaq loh nen òeq ka wì capoch qmèq.

¹⁷ Majah qmang aih diac Boc Plinh aih ùh xài ajang nòe acaq ôq mahaq ajang kan taq atôq, catèm, lem bùi trùh enh Yiang Hadròeh.

¹⁸ Mangai leq tiaq trong aih òeq patih ka Christ aih jah lem manoh Boc Plinh, jah wì manè.

¹⁹ Qmang aih, bèn drah chaq trong broq qmang leq hujah hatroq ti dabau ma òeq broq dua qngah ka dabau.

²⁰ Ûh dùh ðòeq trong acaq raliang đac bìac Boc Plinh ma broq. Rìm dahwèq acaq aih ðìq hruah, bèn acaq mahaq broq ka mangai qnoeq catoeh ataq, aih raq kan dù.

²¹ Ma yeo lem, aih ùh acaq jam, ùh ôq alac rai ùh broq qmòe cleq dôq ka oh ðaq bèn catoeh cro.

²² Bài trong kê, ìh i dèh manoh lùì pang leq, ìh wèq ka raðeh pang aih enh ngèa ka Boc Plinh. Xôq ramot ka mangai leq ma ùh taqmac yiniq lui ka raðeh tiaq trong cla haq ma khoe ðì dèh.

²³ Mahaq mangai leq oe raq i manoh qnhòq dai tùt ka dahwèq ðeh ma acaq aih haq khoe taqmòq ka raðeh yiniq lui, majah qmang aih haq ùh acaq tiaq manoh lùì, yac ka broq cleq mahaq ùh tiaq manoh lùì aih raq yiniq lui.

15

Hatroq ti dabau

¹ Qmang aih bèn mangai ma tadêh, ep wiang pòq blòh kan trap ka mangai ma ùh i ðeh ka padren, apaq broq waq ka lem toq ka manoh deh cla.

² Rìm ngai bèn ep broq lem manoh ka mangai haten hatia bèn, ðòeq i loèq ka wì hu broq dua lem ka wì.

³ Majah qmang aih, yac ka Christ hadai ùh broq lem toq manoh dèh cla, qmang ka bàu khoe achìh: “Bàu bài mangai capoch qmèq khoe ta ùc enh qnhèq ta chac au”.

⁴ Majah qmang aih, rìm yiniq enh nèh khoe achìh hlài ðòeq hnài bèn, dôq enh kan loq àt xam

kan alòng da Hset Hadròeh hnài, bèn jah i kan tangèh.

⁵ Waiq Boc Plình aih xèm da kan loq àt xam kan alòng am ka oh daq jah mòeq manoh oe ti dabau qmang ka Chuaq Jesus Christ.

⁶ Đòeq ka oh daq jah mòeq manoh mòeq bàu ti dabau hu manè apôi Boc Plình, aih Baq da Chuaq Jesus Christ bèn.

⁷ Qmang aih, oh daq drah đìh dabau, qmang ka Christ khoe đìh EsIs 45:23

oh daq, dōq Boc Plình jah kan ranhòm.

⁸ Majah qmang aih au anoe ka oh daq, Chuaq Jesus Christ khoe broq mangai patìh tanòe bài mangai kat akia, đòeq hu patô qnoh Boc Plình ùh gōpla, rai broq ka cajap bàu ma khoe tèu am ka kan cadraq bèn;

⁹ qnah hòm dōq mangai diac wì jah manè apôi Boc Plình taiq kan loq waq haq, tìah ka bàu ma khoe achìh:

“Aih raq, au majah manè apôi Boc Plình taqne mangai diac wì,
Calêu padèch yiniq haq”.

¹⁰ Èh i achìh hòm:

“Dìq ka mangai diac wì, lem bùi ti mangai da Chuaq beq.

¹¹ Èh hòm:

“Dìq ka mangai diac wì,
Drah manè apôi Chuaq, rìm ngai khòh manè haq”.

¹² Êsai hanoh doe:

“Enh rangàu riah da Jêse, jah plòh loh hamenh Moèq ngai ma hu yòng wèq dìq ka mangai diac wì,
Mangai diac wì jah tangèh đeh ta haq aih”.

¹³ Waiq Boc Plình da kan tangèh, broq ka oh daq jah lem bùi rìm trong xam rìm kan catèm ta kan lùì, òòeq ka oh daq canòm ka cwàng itai da Yiang Hadròeh jah bình bauq kan canòm.

¹⁴ Dìq dǒng oh daq da au, au lùì oh daq i bình kan loq hanò, bình kan rabiaq, èh loq hnài dabau.

¹⁵ Joq au khoe yǒc dìq dèh ka manoh ùh hòq ka achìh jàiq òòeq anoe ka oh daq trong kô trong tau, aih òòeq broq ka oh daq hmàng, kan tabàih Boc Plình khoe am ka au

¹⁶ jah wìa mangai patih da Chuaq Jesus Christ am ka mangai diac wì, broq pajàu Bàu lem da Boc Plình, òòeq mangai diac wì jah wìa ramènh lem ka manoh Boc Plình, jah kan hruah enh Yiang Hadròeh.

¹⁷ Aih èh enh da lam ka Jesus au i nen hu catèh raðeh ti ajang nòe au ma khoe patih ka Boc Plình.

¹⁸ Majah qmang aih, au ùh hùà capoch cleq yeo loe ka bài trong Christ ma khoe thê au broq dōq mangai diac wì jah iu tiaq haq, enh bàu capoch trùh yiniq broq,

¹⁹ enh noè cwàng itai xam kan halac, tiaq kan itai enh Yiang Hadròeh da Boc Plình, patep enh Jêrusalem xam bài gùng dudan aih trùh hloe tagùng I-lyri, au aràng Bàu lem da Christ lam jàp jia.

²⁰ Manoh da au toq enh anoe trong Bàu lem tanòe leq yiniq Chuaq Jesus Christ qnhòq lah i cabô ràu trùh, dōq au ùh hiaq broq hnìmh enh qnhèq ka xàn hnìmh wì qnoeq,

²¹ qmang ka bàu khoe achìh:

“Bài mangai qnhòq lah hia trùh haq, aih jah hnoq haq,

Bài mangai qnhòq lah tàng anoe trùh haq, aih jah loq ka haq”.

²² Kô iq raq kan khech tàt, broq ka au khoe bàc yàng ùh jah trùh hmàih ka oh daq.

²³ Mahaq manòeq kô pi oe i cleq tàt padràng au oe ta bài gùng kô, qnah hòm khoe toq leq hanam, au toq ngèh ka jah trùh ti oh daq;

²⁴ qmang aih tàng au jah lam tagùng Ypha-nho, au diq enh troq trong hu hmàih hloe ka oh daq, khoe ka jah oe lem bùi ti oh daq au hadai enh canòm ka oh daq qnung au lam.

²⁵ Hnoq anoe qmang aih, manòeq kô au qnang ti trong trùh ta Jêrusalem òeq hu patìh ka bài mangai hadròeh ta aih.

²⁶ Majah qmang aih mangai ta Maxêdoan xam mangai tagùng Achai khoe lem bùi ta manoh wiang tagop bac jèn hu tabàih ka ba mangai hadròeh da Chuaq ta Jêrusalem ma qnang hamoq.

²⁷ Wì lem manoh broq qmang aih, majoq qnàng wì pòq dòeh mangai Juđa, tàng joq mangai diac wì khoe jah wiang pajùm xôq ramot ti mangai Juđa, aih wì haq ep yỏc dèh kùng hang qnhòng kô òeq hu wiang am ka mangai Juđa.

²⁸ Qmang aih, gòm jò au broq gèh ka biac kô, jò au loq ka joq qnàng wì khoe jah bài dahwèq aih, au hi lam hmàih ka oh daq, èh au hi lam ta Ypha-nho.

²⁹ Jò au trùh ti oh daq, au aràng bình halùih xôq ramot da Christ ka oh daq.

³⁰ Qmang aih, canòm ka Chuaq Jesus Christ da bèn xam kan loq waq loh enh Yiang Hadròeh, au

enh oh daq wiang pajùm ti au trong bàu waiq khàn am ka au enh ngèa Boc Plình.

³¹ Dôq au jah claih enh ti kǝng bài mangai ùh lùì tagùng Judê, ðòeq bài dahwèq au ma wê aràng kô wì oh daq hadròeh ta Jêrusalem jah dì yǝc.

³² Aih èh, au hi jah lem bùì ðòeq hu trùh ta oh daq, canòm tiaq manoh Boc Plình enh, èh dìq ka bèn hadai jah padài ti dabau.

³³ Waiq Boc Plình kan catèm oe ti oh daq! Amen.

16

Bàu bòch hmàih dèh tangai

¹ Au thê mòeq ngai gucadrì yiniq haq Phêbê trùh ta pì, aih hanoh oh daq bèn, haq aih mangai wiang patìh ti tagop oe ta Sencorê.

² Qmang aih, enh dalam ka Chuaq pì ðìh haq ma tajì qmang ka mangai hadròeh rai am ka haq bài dahwèq haq ma i ðeh yiniq nhet ka waq, mājah qmang aih haq hanoh khoe loq wiang am ka bàc ngai qnoeq ta aih hadai i hloe xam au.

³ Au bòch hmàih Bêritsin xam Aquila, wa aih mangai hadai wiang patìh ka Chuaq Jesus Christ ti au.

⁴ Wa khoe tamùà cla raðeh ðòeq hu dǝng kan rìh au, ùh xài mòeq ngai au manè wa mahaq xam Tagop Ha dròeh da mangai diac wì.

⁵ Hadai bòch hmàih trùh ka Tagop Hadròeh ma tagop ta hnim wa aih.

Bòch hmàih ka Êbai-net, aih bua ma dìq jaq haten hatia ka au, oe tagùng Asi, haq aih mangai ma baxèm tawìh tiaq Christ.

⁶ Au bòch hmàih ka Mari, mangai ma khoe xalep ka oh daq.

⁷ Au bòch hmàih ka Antrô-nica xam Juni-a, mangai mòeq gùng ti au, mangai hadai oe tu ti au. Taqne bài mangai Tiaq cla, wa aih mangai i tiang i bang, wa aih oe ta Chuaq adroe ka au.

⁸ Bòch hmàih ka Amlia, bua au oe ta Chuaq.

⁹ Bòch hmàih ka Uroban, mangai abroq ti au oe ta Chuaq xam Êtachi, bua lem da au.

¹⁰ Bòch hmàih ka Abêlo, mangai khoe lem manoh Christ. Bòch hmàih ka oh daq oe ta hnim Arit-tôbu.

¹¹ Bòch hmàih trùh Herôđi-ôn, mangai mòeq gùng ka au. Bòch hmàih ka oh daq oe ta hnim Naxit, aih bài mangai oe ta Chuaq.

¹² Bòch hmàih trùh Triphêno xam Triphôso, aih bài mangai gucadri abroq patih ka Chuaq. Bòch hmàih ka Betsidô, aih bua au mangai khoe broq bàc biac ka Chuaq.

¹³ Bòch hmàih ka Ruphu, mangai Chuaq khoe ràih dèh, xam miq haq mangai hadai khoe wia miq au diq.

¹⁴ Bòch hmàih ka Asincôrich, Pholêgon, Het me, xam oh daq oe ti wì aih.

¹⁵ Bòch hmàih ka Philo-Lojô xam Juli, Nêre xam daq cadri haq, Ôlim xam diq dǝng mangai hadròeh ma oe ti wì haq.

¹⁶ Diq ka oh daq yǝc kan hip lem hadròeh ðòeq hmàih ka dabau. Diq dǝng ka Tagop Hadròeh da Chuaq tanap bàu bòch hmàih trùh oh daq.

¹⁷ Manòeq kô au pariaq diq ka pì oh daq khòh hamang ka bài mangai ma loq ti jrôq chiu waq oh

daq talah ka dabau, broq dua qmèq, crài ka bàu oh daq ma khoe jah hóc. Drah wia ma hangai ka wì aih.

¹⁸ Majah qmang aih wì haq ùh i patìh ka Christ, Chuaq da bèn, mahaq patìh dèh ka trom hǒng, yǒc bàu rangot tiah ka diac cadrot òdeq aluàn padô manoh cliac mangai ma ùh qnì ðeh cleq.

¹⁹ Kan loq iu da oh daq, mangai leq mangai meh khoe loq deh hra, aih ìq dài au majah manè oh daq, mahaq au toq ngèh ka oh daq rabiaq ka trong lem, ùh rabiaq ka trong dù.

²⁰ Boc Plình kan catèm kô èh rênh jôiq padit Satan enh caqnàm jèn h oh daq. Waiq kan loq waq da Chuaq Jesus bèn oe ti oh daq!

²¹ Timôthê, mangai hadai patìh ti au bòch hmàih trùh oh daq, Lusi-ut, Jasôn xam Sobatê, aih hadai mangai Juda troeq ka au bòch hmàih trùh oh daq.

²² Au kô Tec-tiu mangai ma achìh jàiq kô, bòch hmàih ka oh daq enh dalam ka Chuaq.

²³ Gai-ut mangai khoe ðih au xam Tagop Hadròeh, bòch hmàih oh daq.

²⁴ Êrat mangai aih cwan wèq kho ðac ta phôq xam Karôtu, oh daq bèn hadai i bàu bòch hmàih trùh ohdaq.

Bàu manè apôl

²⁵ Manè apôl Boc Plình ma i cwìang broq ka oh daq cajap manoh qmang ka Bàu Lem au ma anoe xam bàu da Chuaq Jesus Christ ma khoe hnài, tiaq kan mahnu ðai kan hlèp ma khoe cadoc enh qnhòng calah nèh,

²⁶ manòeq kô khoe jah patô qnoh, tiaq bàu Boc Plình rìh halình thê, canòm ka ðai hset pajàu pèh

am ka rìm ngai diac wì jah loq òòeq hu ajènh
aràng wì haq trùh ajang kan loq iu da manoh lùì,
²⁷ ajang Chuaq Jesus Christ, waiq kan ranhòm
hlài dìq ta Boc Plình toq haq raq ma rabiaq, halình
mòeq òòeq! Amen.

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d